

... Tikih Jisu hei Christa e, Kamei Ravguangc Nac Mpouh e twmei nang niw lwm khang, kumhna lwmmei paan rui nang niw kazanc khou ringhmei la khang mi guay hei hylou tuang e.—John 20:31

Kandih khou ramh khat thu guang tangh mak khe twmei alauc nunc nchiwna thay pat re. Ramh guay hei nthuih mak ge—pingmei, zaengsime, karaengmei, suc nuhmei, ryanramei, theime, nai e. Tabui zaeng rui mi kumc bam tu cho? Kandih khou hei tabui suai tuang nai tina tha? Mi kabac dinclou nime, nthuihmei ramh khat na nai e—mi kiu Ravguangc tuang nchumhmei, kalat khou ndauhloumei Bible re.

Bible hei kaphai kadung lat ntanghna sa pw khou hah mangh mang bam khang nai e, tikih katuang gaychamv thu nchiw na thay nuh e, machunhmei ti e, kumna mi guay kiu nthukmei pary luang padeih bangc khou zauc nuh e: damcloumei, paapc khou keyloumei, thuaklou datmei, khatni ti nthuihlou datmei. Kabangbi khou rui katwan nganv—Thaureyme book khou rui Ndauhloumei book nganv mi pary luang hei rui Ravguangc tuang charynmei taanv dinc ndauh e.

Mbaan Damcloumei, Paapc khou keyloumei, Thuaklou datmei, khatni Ti Nthuihlou datmei twmei book hei Gaychamv tuang nchumhmei, panty ti kalaic ngammei lat hei alauc nunc rui lalou diuc khang hylou tuang e. Alauc nunc rui thay gay nime lwan khou Bible bamv sinswna, pary hei nking gay khang kasiamhlou pw khou kandih pwmpui na khou nthuih liang daic liangmei kachangcmei tei alauc nunc latow puni, kumna kaniw raanv na tuang panty lam thay pat puni.



DAMCLOUMEI Ravguangc rui ramh guay damclou tuang e, kumna ramh guay kiu gaymei raan na bam khwan e. Ravguangc rui maansei ta damcloumei hei nzianna, chakhwang swna, lat piuna khatni kata thuanckuna bam khang damclou tuang e, kumna kakhou nei hla daic liangmei latowna kamei hei gay liang e twmei lyan bam khang e.



PAAPC KHOU KEYLOUMEI Adam lev Eve tei ramh kabah thay makna Ravguangc khou rui duc tat the, Ravguangc lat liam the, paapc ti pat the, mi khou tei rui theihmei guang the, kumna Ravguangc rui damcloumei gay kanmei kandic khou sime kazaat guay guang the. Adam khou rui meic kathuih khou paapc zin lik pat the, Ravguangc lev maansei ta mi tei rui ti ntamvluou the.



THUAKLOU DATMEI Ravguangc rui kanac Mpouh ta ndiu guanglou the, paapcmei nunc rui phungc nicmei latzan tei Jisu rui cross khou theiclouna phungclou the. Jisu theihmei khou rui ringcthou dat the, ntaw thu tingkauh khou bam the. Jisu khou lwmloumei paan rui paapcmei nunc kaniw paap khou rui kuakloumei, nthuihmei ravchap tatmei, khatni ringcsuangmei panty tuang latryan tei latow nuh the.



TI NTHUIHLOU DATMEI Guangh guay Guangc swna rih ngamna Jisu guang dat puni, tingsaengzeang khang paapc ti hei sw mutlou puni, kumna ramh guay kathanc swna kasiamhlou dat puni. Jisu rui meic kathuih ta latzan sw puni. Kakhou lwmlou makmei guay ta tingsaengzeang khang theihmei latzan sw puni. Tikih kakhou lwmloumei guay thu Ravguangc lev tingsaengzeang nei hlaime khou kamei lev bam nchamc bam puni.

Ravguangc rui kaniw mikdui roulou puni. Theihmei, zaengsime, kapmei, suhmei nai dat lak khe. Reynungc tuang guay tei maan ngam kan the.—Ndauhloumei 21:4


SALLY MICHAEL lev kakaipu David kaney kariuna Truth78 (rey khou thu Children Desiring God tw bam tuang e) phwam hei lingc pat tuang e. Sally rui alauc nunc khang nic ndaih nunc khang nic baansin mpeyna hylou the, mi khou tei Sunday School lairik 20, baihmei book 10, book lau launa geic nganv kazauh the. Katuang ministry hei alauc nunc bumaengh khou daic thau diuc khang Ravguangc lam khou nthukna dinhmei baansin kasiamh patmei khou lung gutna taanc e. Sally lev David Indianapolis khou lungc e, nluh gaan nei puanclou na kanei mic the, kum tina Sally lev David hei kaney tou gaanv thumh nai the.

Mbaanv damcloumei, Paapc khou keyloumei, Thuaklou datmei, Khatni Ti Nthuihlou datmei, Ravguangc tuang Gaychamv tuang Raeng

Sally Michael

T78

MBAANV
**DAMCLOUMEI, PAAPC KHOU
KEYLOUMEI,
THUAKLOU DATMEI,**
khatni
**TINTHUIHLOU
DATMEI**
Ravguangc tuang Gaychamv
tuang Raeng



Hyloumei Sally Michael
Ramh Maengc Hiakloumei Fred Apps



Hyloumei **Sally Michael**
Ramh Maengc Hiakloumei **Fred Apps**

Mbaanv damcloumei, Paapc khou keyloumei, Thuaklou datmei, Khatni Ti Nthuihlou datmei: Ravguangc tuang Gaychamv tuang Raeng

Copyright © 2019 Next Generation Resources, Inc. rui sin e. Ramh maengc guay tuang rui Truth78 rui sin e.

Right guay sin ngam de. Truth78 rui nuhloumei nche kazauh mak ge thei mi book tuang kalangv titna sihni nam pat nuh mak ge.

United States of America khou Truth78 rui phuangclou tuang e.

Bible bamv hyloumei guay tei Nthanmei Bible, BSI rui 2019 kwm phuangcloumei Ruangmei Bible khou rui e, tikh Bible bamv geic nganv thu kasiamh katamvloumei nic nai the.

The World Created, Fallen, Redeemed, and Restored: The Gospel Plan of God

Copyright © 2019 by Next Generation Resources, Inc. Illustrations by Truth78.

All rights reserved. No part of this publication may be reproduced in any form without written permission from Truth78.

Published in United States of America by Truth78.

All Scripture quotations, unless otherwise noted, are from the ESV® Bible (The Holy Bible, English Standard Version®) copyright © 2011 by Crossway, a publishing ministry of Good News Publishers. Used by permission. All rights reserved. ESV Text Edition: 2016.

ISBN: 978-1-952783-05-0

Truth:78 /

Guang nimei Meikin rui Ravguangc ta Thay diuc khang. Kata Chakhwang sw diuc khang khatni kata Ning nthuk bam diuc khang Kaniw ta Kasiamhloumei

Truth78.org · info@Truth78.org · 877.400.1414 · @Truth78org



Brian lev Cindy Eaton zanc khou ti patlou the.

Nang ney ta Ravguangc maengc khou *damclou the*,
Adam khou paapc khou keylou kanmei lwnlung zaeng rui Damcloumei pu khou rui duc
pat the, Christa rui katpatna cross khou theicloumei paan rui *thuaklou* dat the,
Kumna neih khat thu hym daihmei khou ti *nthuihlou* dat puni!

Nang ney ta pam swmei hei Ravguangc tuang kaipat re.
Siamruai taanv khou baanh ngguakna taanc nchamcmei hei rui lung h ti thaulou e.
Nang ney rui Gaychamv khou lung h gutmei hei rui meic lungning ti kathanclou e.

Nang ney nac nunc twmei thu,
—Joe, Natalia, Mariah, Isaiah, khatni Grace—
Kaniw guay Lauziu Nac Nowsuan khou guangmei sw diuc o.

Puipu Guay rui Thaylou khang:

Bible khou naimeï pary luang guay hei alauc nunc thay khang kage nai e. Bible hei kariang nai thuai makmeï pary lau launa lou kaduailoumeï book de twna alauc mpeyna rui ning e. Lat khang kiu, Noah lev hih daihmeï pary, Moses lev mai chuangc bammeï nwmbaap pary, David lev Goliath pary, twna mi guay hei pary baic taph tapmeï khang kumcna kaniw ning e. Bible rui thu kakhou naimeï pary guay hei kariang maekmeï, kalangv langv nameï pary khwam kaduailoumeï kumcna ti ning pat khang swlou mak ge tikih pary guay tei kariang naina, pary daihmeï khat nameï tuang naatnw swna mbaanv damhmeï khou rui thauna tingkauh kathanc kandih kathanc guang tanghmeï pary nganvna ti howlou e.


Jisu rui theicloumeï paan rui thuaklou datmeï pary hei Bible tuang kakw swmeï pary de tikih alauc nunc khang Bible dincloumeï ganv khou Jisu rui cross khou theicloumeï khou tei rui dinc thau raph twmeï hei nthuih changh mak ge. Nchumhmeï Racguangc khat na nai e, kameï rui ramh guay hei damclou tuang e twmeï tuang nthukmeï kabac hei alauc nunc rui how ngam khang kage daicna nai e. Meic gaanv khat rui paapc khou keyloumeï khou rui kandih kapwm khang heidi kamv simeï meic kathuih khou guang e twmeï hei alauc nunc rui makumh pat mak nuh makmeï e. Bible book kalwan swna nai bammeï khou Ravguangc lam khou kaduanc naina ndauhloumeï thei layna aniw nic alauc nunc khang dinhmeï ganv khou mi lwan khou tei pary duanc swna dinclou rey nina de. Alauc nunc khang Bible dinhmeï hei kaduanc nthanna, kalangv thayna, kalwan chana dinclou nina e, nchumhmeï lat khat khou rui nchumhmeï lat khat nsuk keyna dinclou nina e.

Bible hei kabangbi khou rui kaduanc naina dincloumeï khou rui guangmeï Ravguangc ta thaymeï tuang nthukmeï tei thu mi book launa hei rui alauc nunc khou ti pat khang ngam mak ge, tikih, Bible khou nthukmeï pary luang padeih twmeï thu damhmeï pary, paapc khou keymeï pary, thuaklou datmeï pary, khatni ti nthuihlou datmeï pary hei thu alauc nunc khou ti thaylou khang karamc puni. Mi pary luang guay khou hei nang niw nac nunc rui Bible tuang pary kiak kiak guay tei duanc clouna Bible kapwm tuang lwn tei how pat ngam khang kaniw khang phaydyng sw puni.

Mi book hei pac pw khou ningtolou khang kabangc khou hei latbamv asaekc tilou e:

- Nang niw nac nunc rui thay ngam nicmeï chaengc khou tei paclou o. Mi kiu e thei, mi book hei pac guayna khou rui pac ngam mak bam nuh e. Nah nunc rui nking gaymeï langv, kabah thay ngammeï dak, kakhanh nchamc nuhmeï dak khou na tei paclou o.
- Mi book hei pac pw khou alauc nunc lev thanv pat thanv gutlou pw o.
- Pary luang nthukmeï—twmeï thu damcloumeï, paapc khou keyloumeï, thuaklou datmeï khatni ti nthuihlou datmeï twmeï padeih hei ti ningtow kaluaih dat datlou o.
- Pary pac nthaekclouna kabah chameï lu suan nuh e, hymn hamh mak ge thei kalummeï lu gaymeï nking nuh e. Lu luai mak saanv suan mak sihni nuh de.
- Alauc nunc rui thay ngam nuhmeï chaengc baic baicna naimeï thei layna pary luang nthukmeï padeih hei dinh khang Bible bamv baic baicna nai puni. Bible bamv guay tei pac ngam nic nuh e, kalangv khat na pac nic nuh e. Alauc nunc rui kabah thay lakmeï latkaeng guay tei dinc nthanlou o.
- Bible bamv naimeï nunc tei zauh makna pac thay khang karamc zauc o.
- Mi book hei alauc nunc khang pahmeï ganv khou Ravguangc rui kaniw lungning mik ti rak patlou khang huayneylou o.

Ravguangc tuang gaymeï khatni kahym daihmeï, paapc ram si kalingmeï tei, khatni cross khou Jisu rui zei keyna theicloumeï zauzian, khatni ringcsuangmeï panty lev Ravguangc khou maan dat lakmeï ram neihla latow nimeï tei nang niw nac nunc rui how patmeï sw diuc o.



DAMCLOUMEI PARY


Thaurey khou Ravguangc rui tingpuk lev kandih damclou khwan e...Kumna Ravguangc rui kamei kasiamhlou kanmei guay tei zauc the, kumna zauclo, mi guay tei peyna gay the.—*Thaureymeis 1:1, 31a*

Ringhpouc ta ping o, mbaanv kapwm! Kata champouh o, kandih nam ruc khou lungc bammei maansei katana! Kamei rui sa pat pw khou kandih damclou the; kalatdanv khou ramh guayna pat the.—*Kalumlu 33:8-9*

Mi kandic hei kumhna nai pat tuang cho?

Mbaanv kandic hei khat namei, nchumhmei Racguangc khou rui ti nai thau tuang e. Kamei hei ramh guayna Kaipouc e. Katuang ngamv naimei lai paan rui mi mbaanv kapwm—zingbangc kalaanv, tingpuk khatni duipui, kandih khatni thingnuy pannu, kaguay damclou e. Bw, neih gaanchuangcna guay kamei rui damclou tuang e. Mi guay hei gaymei raan na e, kumna Ravguangc tuang ngamv khatni katuang gaymei lyan e.






Tikih Ravguangc rui mi khou tei
nthaekc mak khwan e.

Ravguangc tuang ngamv khatni
katuang gaymei khou tei rui
khavga, nthaw nruay, khatni
khouringh khounah guay ta
damclou the.

Ravguangc rui damclou-
mei puat guay zanc asaekc salou
nuh puni bo?

Ravguangc rui kamei damclou kan-
mei guay tei how the, kumna mi tei
gay the.



“...Ai hei Ringhpouc,
ramh katana ta damcloumei
pu e. Ai rui tingpuk laemv ntyng patloumei
tuang e; Ai kandih ta meic baihmei kazauh
makna zay ntingh patlou tuang e.”

-Isaiah 44:24b

“He Ringhpouc, nang rui ramh mpeyna damclou e! Nang rui
mi guay hei adih ningtyngna damclou tw cho!..”

-Kalumlu 104:24a

Mi kumc bam khou tei Ravguangc rui damcloumei guay khou rui katuang kungc liangmei baansiam khat kasiamlou the.

Mi baansiam kiu thu baihmei guay khou rui baic taph tap the. Kata thu Ravguangc lwn luicna, khatni kamaengc khou damclou puni the. Damcloumei puat baihmei nunc kumh makna mi hei rui thu khat rui khat ta nzianmei nai ngam puni the, kakhanh ngam puni the, kalam thu Ravguangc ta luicna damclou the.

Mi baansiam hei thu Ravguangc tuang nthanmei lev katuang gaymei ndauhna lunglyan bam khang the. Damcloumei puat baihmei guay rui ndauh ngam makmei Ravguangc ram gay khatni katuang ngamv mi baansiam hei rui ndauh diuc khang the. Mi baansiam ta damc nic khou thu Ravguangc rui latkaeng na sa makna, taanv swna taanc the. Kata thu nthuk liangna damclou the. Kabaansiam guay pang khou rui gay liangmei the.

...Khou tei Ringhpouc Ravguangc rui kandih khoumei mbut khou rui maansei kasiamhna kanukwang khou ringhmei thiunmbunlou the, kumna maansei tei meic ringhmei sw pat the.—Thaureymeis 2:7

Mi pu ta kiuc Adam twna kawlou the. Maanseina pu Adam rui lungc bam khang khatni zauc sincna bam khang Ravguangc rui pikuan akhat kasiamlou the. Mi pikuan khou tei how gaymei thingbang, tu gaymei tingthai bang, kathw naimei thai, kanuy how gaymei, kabang, kamaan tanhmei, kathai tu nuhmei kazaat guay lingclou the. Mi guay tei Ravguangc rui Adam khang kanyng swna tu bam diuc khang tilou the. Thingbang khat na twmei thu—sigay thaymei chwn ti patmei bang khoomei thai thu tu khang nuhlou mak khe. Mi bang lam khou kiu Ravguangc rui Adam khou nthukmei latdanv tilou the. Ravguangc hei Adam ta damcloumei pu na hamh mak ge, kakaipouc na nic hamh mak ge, kapam nic e. Tikih mi na kiu hamhna, Ravguangc hei maansei khang gay liang nimei ta thaymei pu e.

Ringhpouc Ravguangc rui maansei khou tei latdanv tina sa the, “Pikuan khou naimei thingbang guay khou rui kathai nang tu nuh ngam de; tiki sigay thaymei thingbang khoumei thai tei thu tu lak nina e; kalam thu mi tei nang tu raphpui nungc nang theic puni the.”

-*Thaureyme* 2:16-17

Ravguangc hei nzian thay e, katuang nzav mak ge. Adam khang kage naimei thai guay kamei rui tilou e. Adam rui neihlana lungc bam diuc khang khatni kandih ta tukumhna zauc sinc bam nina cho twmei dinclou e. Adam khang si nimei tei kamei rui salou rey e. Mi hei rui Ravguangc lam khou tabui dinclou bo?



Ravguangc rui Adam ta damcloumei khou tei katuang gaymei, charynmei ngamv khatni kahym daihmei ndahlou the, tikh mi khou na tei nganvlou makna maanseina khang kadanmei khatni nzianloumei hei geic mbuna lyanlou khang nai di he.

Khou tei Ringhpouc Ravguangc rui sa the, “Mi maansei hei karna bammei gay mak ge. Kakhang cha raph rapmei nkhauloumei gaanv khat kasiamlou ni the.” ...Kumna Ringhpouc Ravguangc rui maansei ta tei ti zip theic mangh manglou the, kumna kamei zip bam khou kanaekh khat laa patna kazanc rui gum binlou the. Ravguangc rui mi naek khou tei rui ntumei gaanv khat kasiamlana maansei khang tei la guang the.—*Thaureyme* 2:18, 21-22



Kumna Ravguangc rui maansei ta kalwn luicna damclou the, Ravguangc lwn luihmei khou kata damclou the, Ntumei lev nggaanvmei swna kaniw ta damclou the.—*Thaureyme* 1:27

Adam lev Eve rui Ravguangc ta nzian khang, kakhou lwm bam khang, khatni kalat piuc bam diuc khang damclou tuang e. Ravguangc ta chakhwang sw bam khang, kata thuancku bam khang, khatni Ravguangc ram gay khou tei neihlana bam khang kaney ta damclou tuang e. Mi paan tei rui ramh guay ruc khou Ravguangc hei gay liang e twmei lyan khang damclou tuang e. Ravguangc tuang ngamv khatni katuang hym how bam diuc khang, khatni Ravguangc ta thaymei khou tei kaney khang neihla liangmei latowna bam diuc khang damclou tuang e.

Adam lev Eve kaney tei nthuih thikh thikmei kandic khou lung h tuang de, suc nuhmei maekmei kandic, simei maekmei, karaeng zauczihmei maekmei kandic khwan e. Lung h-puamc zawzinghmei, chwensi zaengsimei, lungning khou bam key lakmei guay maek ge. Mi guay khang suangc kiu sihni gay ranvmei thu, kaney tei Ravguangc lev pikuan khou tei bam nchamc bam khwan e, Ravguangc lev kachuc bam khwan e, khatni kamei lev neihlana kariu bam khwan e.

Mi kumhmei kandic khou kiu nang nic lungc ni bo?

Mi khou tei lunghmei ram gay kiu akumh bam khang zi bo?

Taac Nuhmei: *Internet khou Chris Tomlin rui suanmei "Indescribable" twmei lu tei zaucna nking o, Mi lu tei nkingna bam khou Ravguangc tuang charynmei hym daihmei lam khou makumh o.*






PAAPC KHOU KEYLOUMEI


Kalam thu Ravguangc ta thay nuhmei lam kaniw khang nthanna nai de; kalam thu Ravguangc rui mi tei kaniw khou lyanlou kan de. Kalamthu mik rui how makmei katuang guncgac guay, twmei thu, katuang tingsaengzaeng ngamv khatni kamei Ravguangc swmei lwnlung guay hei mbaanv damclou raph khou rui kabaansiam guay khou nthanna how bam tuang di the. Mi zaeng rui, kaniw khang ley duak datpui chaeng maek khe! Kalam thu kaniw Ravguangc ta thay sihni, kaniw kata Ravguangc e twna chakhwang sw mak ge khatni thuancku mak ge. Mi phaan tei kaniw lungning gaeng makmei khou kakhanhna kaniw tuang mpangmei lungning guay tei ti zingclou ngam the.—*Romans 1:19-21*






Adam lev Eve tei kaney daeng khou nai bammei damcloumei puat guay khou tei Ravguangc tuang ngamv khatni karam gay how bam khwan e. Guaipwang tuang pwmtan khatni kauh samhmei nruay thauruay guay tuang how gaymei guay kaney how khwan e. Tu gay kanmei tingthai tu tow bam khwan e, neih riw khou rui lumc gunh gunmei phauc tow khwan e. Ravguangc lev nzianna kariumei khou tei kamei lev tat chamcna kata kachucna bam khwan e.

Tikih zaengsimei thu mi kiu sihni kaney khang pian mak khe. Ravguangc rui gaeklou bammei, kadanlou bammei, khatni kamei rui kaney pam swloumei tei kaney khang biuh mak ge twna ning khwan the. Ravguangc khou ngangvloumei khang suangc kaney raan na khou ngangvlouna lungc ni khwan the. Ramh guayna ruc khou kaney kauh liang nthuk liangmei sw ni khwan the. Ravguangc lat khou lwmlou mak khe, Ravguangc hei gay e twmei kaney lalou mak khe.



Ravguangc ta chakhwang sw bam khang, kata nzian bam khang, kalat piu bam khang, khatni kaney khang gay liangmei kiu Ravguangc rui thay bam e twmei lwm bam diuc khang kaney ta damclou tuang de tikih Adam lev Eve tei mpang the, Ravguangc khou rui kaney twanlyam pat the. Tu nuh mak ge twna Ravguangc rui saloumei sigay thaymei thingbang khou naimei thai tei kaney rei key the. Reymeikhou Eve rui la tu the, kumna Adam khang nic kamei rui ti the, Adam nic Ravguangc lat liamna mi thai tei tu muay the.



Pikuan khou tei Ravguangc tat guang pw khou, Adam lev Eve tei Ravguangc daeng khou guang mak khe. Mi phaan tei Ravguangc khou rui pak tatna kaney dup the. Tikh ramh guay thay ngam pryemei Racguangc hu khou rui meic gaanv khatna rui sihni dup duak ngam mak ge, Ravguangc lat liamna kakhou rui ley duak khang ngam mak ge, lat liammei phy suai makna keylou e.

Ravguangc lam khou Bible rui mi kumcna salou e:

Nthanmei nang mik rui simeit ta zauc ngam mak ge, khatni meic nunc rui nkhuamei taanv taanc bammei ta nang zauc bam ngam mak ge.—Habakkuk 1:13a

Adam lev Eve rui Ravguangc latdanv twan pw khou, Ravguangc lev kariu bammei riang tei nic tap the. Kaney lungning tei paapc rui padikpui zaeng rui nthanmei Racguangc hu khou kaney guang dat ngam mak khe. Adam lev Eve tei pikuan khou tei lungc bam dat ngam mak khe, khatni nthanmei khatni nthuihmei Racguangc pam sw dat ngam mak khwan the. Kaney panty tei ntwaw thu suhmei ryanramei, khatni katuakcmei rui padik thau puni the.



Ravguangc rui paapc ta latzan swmei hei nzih e. Paapc tuang taanvphy tabui ti nina cho twmei latdanv ti khang kakhou ngam nai e. Sigay thaymei thai tei tu ri o twna latdanv ti khou salou kanmei kumcna paapc tuang taanvphy thu theihmei rui latzan sw puni the. Ravguangc rui samei kumc raphna paapc zaeng rui gay kanmei kandic khou tei theymei guang the. Mi khou tei rui thauna ryanra ryanriumei, lunghpuamc zawzinghmei, karaeng zauczihmei...twanlyammei, kanlak mamav mamiwmei, kakhang na ningmei mi kumhmei guay hei nai thau the.

Adam lev Eve khang ntaw thu paapc tuang ryanramei nai thau the. Tikih Ravguangc thu gay e, nzian thay e, kumna kamei rui Adam lev Eve tuang zakmei duamliamlou khang kasiamlou the. Ravguangc kahak rui khouringh gic khou rui kaney khang pheybaan kasiamlou the. Khouringh gic tei ruamc pat nuh khang rui khouringh tei kumh puni tha?

Theihmei tei kandih khou nai thau the. Mi khou tei rui thauna ramh guay hei baic ngam puni the. Nthuihmei gay kanmei Ravguangc baansiam tei ntaw thu paapc lev theihmei khou kap kalangvna bam the. Tingsaengzaeng khang mi kumc bam puni di tha?

Adam rui latliamloumei zaeng rui
paapc hei kanac nunc khou keylou
puni the, kanac nunc nac guay khou nic
zinlik key puni the, kaganv kathuihna
khou khatni kabamv kathuihna khou
meic naina khou keylou puni the.




Hei zaeng rui meic gaanv khat khou rui mbaanv khou paapc guang the, khatni paapc khou rui theihmei guang the, Mi kumcna theihmei hei meic guayna khou guanglou the; kalam thu meic guayna paapc taanc the.—Romans 5:12

Ravguangc hym daihmei khatni nthuihmei lyan diuc khang Ravguangc rui aniw ta damcloumei lwan khou tei aniw lyan dat ngam mak khe. Ravguangc hei gay e, nzianmei e, lwm nuhmei e, khatni kamei rui taanhmei guay nzih e twmei lyan khang aniw ta damclou tuang e. Mi kiu lyanmei phaan khang aniw lungning hei kakhang kakhang na ningmei rui padik the, nzian thay mak ge, lat piu mak ge, twan lyam e, lwm nuh mak ge, gaengh sw e, khatni kanlak ge. Nang nang khang na ningna swloumei ta ningtow bo? Nzian thay makmei lwn swloumei, lat piu maklou kanmei ta ning pat dat bo? Tabui sw tina nang kum bam tuang cho?

Meic gaanv khat na sihni paapc kazauh makmei maek ge. Nthanmei khatni nthuihmei Racguangc khou rui aniw ta ti ntamv duclou bammei paapc simeihmei hei meic kathuic khou nai e.

..kalam thu meic kathuihna paapc taanc the, kumna Ravguangc tuang hym daihmei khou guang tangc ngam mak khe.—Romans 3:23

Tingkwm tat kanmei thei layna paapc hei meic kathuihna khou rui zinlik pat re, kalam thu meic kapwm na hei paapc phungc the. Ravguangc tuang gaymei khatni hym daihmei hei damcloumei puat guay khou rui how pat nuh bam di he...tikih Ravguangc tuang baansiam hei ntwaw thu paapc rui sw mphuamloumei di the, ryanramei rui padik the, suc nuhmei rui padik the, simeihmei kazaat kathuic nai the. Aseic dou hei kandih khou tabui simeihmei nang how bo?



Mi kandic khou nai bammei sime, theic suhmei guay hei aniw rui ti gay khang pumtan maek ge. Paapc rui padikmei aniw lungning ta ti gay khang aniw ngam mak ge. Aniw tuang paapc padikmei lungning khou rui khatni mi kandic tuang ryanra ryanriumei sime khou rui gulou khang kachaeng nai puni bo?

Nthanmei Ravguangc hu khou aniw hei lalou biuhmei tukumhna sw dat khang tha?

Ravguangc ta tukumhna chakhwang swna, kata nzianna, khatni kalat piuna lungc dat ngam nina tha? Neihlamei khou, nchu nzaenghmei khou, gaymei khou, khatni nthuihna nzianmei khou tukumhna aniw lungc dat ngam nina cho? Kachaeng nai dat puni dai?


Adam lev Eve rui paapc taanc kanmei tangv, Ravguangc rui kaney paap lev zakmei nkamhloumei na hamh makna kamei rui

Latryan khat

nic swlou e.

Ravguangc rui thuakloumei Pu ta ndiu guang puni. Maansei guay tuang paapc taanvphy tingsaengzaeng khang la ganclou nime, khatni ramh guay ta ti nthuihlou dat nime, kandih khou gay makmei guay ti gaylou nime, khatni maansei lungning khou sime guay la ganclou nime
Pu ta ndiu guang puni.

Sime guay makmei ta niakpuatlou nime pu guang puni.





THUAKLOUMEI

Aniw paapc khou rui duak patna ravchaptatmei khou lungh khang kamei kahak rui thing ruc khou kapumc khou aniw paap phungclou the.—*1 Peter 2:24a*

Adam lat liampui zaeng rui meic peyna ta paapcmei ti swloumei kumcna, Christa lat piupui paan rui meic peyna ta ravchaptatmei ti swlou puni.—*Romans 5:19*


Aniw khou paapc tuang simei khou rui aniw raan na ti gay dat ngam mak ge, hamh e thei gaymei nthanmei Ravguangc hu khou lalou nuhmei sw khang aniw raan na sw ngam mak ge, nthuihmei kandic khou aniw lungc tow dat ngam mak khe. Ravguangc hei aniv khang zaeng gay liangmei sw ngam mak khe, kata chakhwang sw ngam mak khe, kata nzian ngam mak khe, kalat piu ngam mak khe. Tikih Ravguangc rui paapc tuang simei ta la ganclou khang ngam e, mi kiu Ravguangc na rui ngam e. Ravguangc thu ngam pryemei e, kaganv kathuihna khou gay e, biuh makmei paapcmei nunc khang sihni nzianmei padik ge, khatni ningting rui padik ge. Paapc tuang simei la ganclou dat khang Ravguangc rui pikuan baihmei khat lev thingbang baihmei khat sinsw dat re. Tikih mi hu khou tei Ravguangc rui charynna nzianmei lev kat patmei taanv khat taanclou reye.

Ravguangc rui Kanac Mpouh ta mi kandic khou hei maansei swna ndiu guang the. Jisu rui tingkauh gay kanmei, nthuihmei, nzianmei rui padikmei, nchu nzaenghmei, bam mpatlouna paapc rui padikmei, suc nuhmei rui padikmei kandic khou hei ngaana swna guang puanclou the.



Kabangbi thangc rui paapc
lev latzan khou rui maansei
ta gulou dat kang twmei hei
Ravguangc tuang raeng khwan
e. Adam lev Eve, khatni maansei
baihmei guay kumh makna
Jisu thu nthuihmei, paapc
maekmei panty khou lungcna
Kapu Ravguangc tuang gaymei,
kahym daihmei, khatni nzian
thaymei lungning tei lungc
lyanlou e.


Jisu guangmei thu
Ravguangc hei thow
cho twmei lyanlou
khang...nthuihmei
ram zian lyanlou
khang, lwm nuhmei
lwn lyanlou
khang, Ravguangc
tuang ngamv lev
kuakloumei lyanlou
khang e.




Jisu rui suc nuhmei nunc
ta ti gaylou e—mi tei rui
paapc tuang syang ta
sw baklou e. Phaybaanh
chuanchamei ta ti gaylou
e, mik tiatmei ta ti howlou
dat re.


Tingpwanzingh ta latdanv tina
ti nchwnglou e, khav kanei lev
ntyan dwm panguh na rui meic
5000 ta ti tu nggulou e. Mi tei rui
Ravguangc tuang ngamv lyanlou
e. Ravguangc na rui taanc ngam
nimei taanv kamei taanc e...
kalam thu

Jisu hei Ravguangc e.



Paapc lev paapc tuang taanvphy khou rui duak khang paapc khou rui Ravguangc khou ngalanc guang nina e twmei kamei dinclou e. Ravguangc gunc gaymei twmei thu simei khang gaymei ti lyn khang, khat khat ta kuaklou khang nchamlou e. Kakhou lwmloumei nunc khang Kapu Ravguangc rui tingkauh khou bamv chandaanv bammei khou tei ti lungclou puni twna latryan swlou e, mi khou tei Ravguangc lev tingsaeng-zaeng kaniw lungc bam puni. Maansei hei Ravguangc lev nthuihna gayna bam kariu dat nuh puni the, kamei lev tat nchamcna zaw lev zaw kachuc dat nuh puni the. Mi kiu e thei thu, mi hei rui Ravguangc lam khou tabui dinclou bo?






Kum e tikh, Ravguangc tuang latryan guay kiu ti guang tangclou khang gaanv khat rui maansei tuang paap manv khangclou khang kage nai the. Mi Gaan Khat kiu Jisu e. Paapc zaeng rui Ravguangc tuang lungpuam lev latzan tei phungc puni the twmei Jisu thay de. Maansei ta gulou dat khang ryanrana zeihaengh keyna theic puni the twmei kamei thay de. Ravguangc rui kata ganc pat puni the, si liangmei ram thei, kanganv tangcna ryanramei, khatni lungh kabiumei kamei phungc puni the twmei nic thay the.

Jisu rui Ravguangc tuang raeng guay kiu ti guang tangclou puni dai? Paapc padikmei maansei nunc khang kamei theiclou ni puni dai? Jisu rui pikuan khat khou tat the, mi tei Gethsemane Pikuan e. Kapu Ravguangc ta kamei kachuc khang kage nai the. Kamei pun nkhum keyna huayney the.


“Apu, nuh e thei mi buangc hei akhou ti guanglou ri o; tikh ai rui ningmei hamh e, nang ningmei de”—Matthew 26:39b


Cross khou kasyng tangcna ryanra puni the twmei Jisu thay de tikh Ravguangc lat nthuihna piu khang tei rui aniw paap zaeng khang theiclou khang kamei nuhlou the. Tingsaengzaeng khang pow khangclou guaina khangclouna paapc tuang taanvphy sw nthanlou khang kamei nuhlou the. Ravguangc rui kuakloumei lev nzianmei aniw latow dat diuc khang rui kamei nunc tuang paapc tuang latzan tei Jisu rui phungclou khang nuhlou the.



Jisu thu nchumh makmei khat
na sihni taanclou mak ge tikh
rihmei nunc rui kata nym
khang guang khwan the.

Kaniw rui kata bai the, kata sinnui the, kumna kapy khou sauh rui kasiamei pyrun runlou the. Jisu rui cross kasiame nimei thingdangv tei kangumc khou puanca tat the. Mi thingdangv tei tingbang akhat khou rui la pat tuang e.





Calvary chingc khou Jisu ta cross khou hianbinlouna karaan na ryanra khaengvna theic diuc kang ganclou the.

Kata kanlou kang kauh baanchra ricmei pang ta kaw key nuh tuang de. Kata swluai kang sw bammei nunc tat teic kamei cross khou rui key dat lana sw luai ngam nuh tuang de...tikih kamei mi tei sw mak khe. Cross khou rui kamei key mak khe. Kakhou lwmloumei guay kang katuang nthuihmei ravchaptatmei twmei thu latpiumei suaihi-am tilou kang paapc zaeng rui kamei theiclou the.


Mi tangv tei kata khowlang kumhmei
tarou khou mbeihlou the

Guloumei Pu kiu theic kan the

Theic kanmei Guloumei Pu kiu rui kumhna kandihmei
guay ta kanlou ngam puni na?

**Paapcmei nunc khang gulou nuhmei
chaeng baihmei nai dat di hai?**

Nai e, gulou nuhmei chaeng nai e! Ravguangc tuang raeng thei layna zaeng neih thumhpui nungc Ravguangc rui Jisu ta theihmei khou rui ti ringc thaulou the. Jisu thu theic nzut mak khe. Paapc lev theihmei ruc khou kangamv lyanlou the. Kamei ringc thau datna kapammei nunc lev kachuc the, kabaanc khou zutpi hianloumei nchinc guay nchinlou the. Kaniw lev taektw tu nchamc the. Kumna gay ranvmei guangcdic...Ravguangc guangdic guang nimei lam dinclou the.





Mi tangv tei Pu Ravguangc tuang baan-
 zat khou ti dungclou khang Jisu ta ting-
 kauh thangc laku kan the. Thow puni
 Jisu khou lwmloumei nunc, kata Gulou-
 meipu, kata Guangh e twna laloumei
 nunc, khatni kata Kapam e twna lwm-
 loumei guay rui paapc khou rui kuak-
 loumei latwo kahgn khatni Tingkauh
 khou ringcsuangmei panty nrianhlou-
 mei tei latow khang Jisu rui chaeng ka-
 siamhlou the.

Kalam thu paapc tuang taanvphy thu
 theihmei e; tiki Ravguangc tuang kai-
 pat thu Poubauhmei Christa Jisu khou
 ringcsuangmei e.

—Romans 6:23

Taanc Nuhmei: Internet khou Ben Fielding lev Reuben Morgan rui suanmei
 “Stronger” twmei lu tei zaucna nking o. (Christ’s Community Church rui suanloumei
 tei gay ranv e. Mi tei October 5, 2013 kwm tuang e.) Mi lu tei nkingna bam khou
 Jisu rui paapc tuang syang sw bak khang tabui taanclou kan tuang cho twmei
 makumh o. Chris Tomlin rui suanmei “The Wonderful Cross” twmei lu tei nic nuh
 e. (First United Methodist Church, Luling, Texas mei nunc rui March 7, 2017 khou
 suanloumei tei gay ranv e.) Cross hei ryanramei bamv nic sw, suaihiam latowmei
 bamv nic sw twna charynmei bamv sw bam tu cho? Mi lu khou tei syang lev
 suaihiam tuang khatnahmei tei kakhanh zauc o. Syandui syanlanv latowmei thu
 maan gaeng mak ge, ryanramei khou nzianmei latowmei, ringhmei tilou khang rui
 theicloumei, mi kumhmei namthei tatmei guay hei makumhlou pw o.



TI NTHUIHLOU DATMEI

Apu kai thangc, nang niw bam khang kabamv mpeyna nai e; kum mak khwan e thei, ai nang niw khou salou puni tuang e. Mi khou tei nang niw bamv khang chandaanvlou khang ai tat ni he. Ai tatna nang niw bampui bamv khang chandaanvlou tang e thei, nang niw ta guang laa dat puni, kumna ai bampui bamv khou tei nang niw ni bam puni.

—John 14:2-3

Tikih Ravguangc zauzian thu heidikamv daic e khatni kamei rui aniw ta heidikamv nzian e. Twmei thu, aniw twanlyammei zaeng rui theic bam khou, kamei rui aniw ta Christa lev ti ringcthaulou dat nchamc the. Nang niw ta guloumei hei Ravguangc zauzian paan rui e. Christa Jisu khou aniw ta kamei lev ti ringcthaulou dat nchamcna tingkauh kandic khou tidungc nchamclou the. Mi hei, kamei rui aniw ta nzianmei Christa Jisu paan rui ndauhloumei sa dat khang thay makmei kazauzian tei guang nimei ganv guay khou ndauh bam khang swlou tuang e.

—Ephesians 2:4-7

Neih khat thu Jisu guang dat puni twna kamei rui kadylou duc e. Paapc tuang simei guay ti maanlouna, ramh guay kathanc kasiamh dat khang kamei guang dat puni. Mi kiu Jisu rui tabui thiak khou sw puni bo?

Jisu guang dat pw khou thu nngana swna guang dat lak khe, guangh swna guang dat puni...guangh guay Guangc swna guang puni! Paapc lev simei ta lazan sw khang khatni tingkauh kathanc kandih kathanc kasiamh dat khang ngamv lev nchumh nzihmei phungcna guang puni. Jisu rui meic kathuih ta latzan sw puni twna Bible rui sa e. Adam lev Eve kaney rui Ravguangc khou rui dup duak ngam makmei kumc Jisu, guangh guay Guangc khou rui meic gaanv khat na sihni nkamv ngam ni tuang hamh the. Thow puni paapc khou rui lungh laic guang makmei, Jisu khou lwmlou makmei, kata chakhwang swna, nzianna, kalat piuna lungh makmei guay tingsaengzaeng khang syang la puni the. Kaniw thu tingsaengzaeng ryanramei bamna paapc tuang latzan pow phungc puni the. Jisu khou lwmloumei nunc, kaniw paap khou rui lungh laic patmei nunc, kalat piuna kakhou ngangvlouna lunghmei nunc, tingsaengzaeng khang Ravguangc lev lungc puni the.




Damc thanh datmei tingkauc lev kandic lam khou Bible rui saloumei kiu mi hei the:

Mi tangv tingkauh kathanc khatni kandih kathanc ai how e. Reymeit tingkauc khatni reymeit kandic tei maek khe; duipui nai dat mak khe. Kumna Nthanmei Kaidai, Jerusalem kathanc tei kagaanv khang karuhloumei nowpeic kumcna Ravguangc khou rui tingkauh thangc rui keymei ta ai how e. Khou tei guanghdwng khou rui kauc ranvna mi kumna samei ai chu e: "Zauc lo, ntaw khou rui maansei pang khou Ravguangc kai sw puni the. Kamei kaniw pang khou lungc bam puni the, kumna kaniw kamei nunc sw bam puni the. Ravguangc kahak kaniw lev bam nchamc puni the, kumna kamei kaniw Racguangc sw puni the. Ravguangc rui kaniw mikdui roulou puni. Theihmei, zaengsime, kapmei, suhmei nai dat lak khe. Rey nungc tuang guay tei maan ngam kan the."—*Ndauhloumei 21:1-4*

Tikih mi khou tei nthan makmei, khatni meic chanymei taanv taanhpui meit khatni saraemhpui meit gaanv khat na sihni gut lak ge. Lauziu Nac tuang ringhmei latrik khou kazanc naipui meit nunc na tei gut puni.—*Ndauhloumei 21:27*





Mi latzan nungc kiu nang tabui khou ding puni cho? Jisu khou lwmlou bammei nunc pangc khou Jisu lev tingkauh nthuihmei gaymei khou tei tingsaengzaeng bam puni dai?

Hamh e thei Ravguanc ta nuh makna karaan raan na ningmei khou tatna kaniw raanv na khou ngangvlouna lunghmei zaeng rui tingsaengzaeng tuang latzan tuang ryanramei khatni suhmei phungc nicmei nunc pangc khou bam tw ny?



Jisu rui cross khou theiclou the twmei hei paapcmei nunc khang gaychamv the. Paapc kuakloumei, nchu nzaenghmei, ringcsuangmei panty...maan dat lakmei neihla suangmei, la ganc dat lakmei kamei rui ti e. Mi guay kiu kamei rui nsana khang kaipat swna tie.

Kalamthu zauzian rui nang niw ta lwmmei paan rui gulou the. Nang niw taanv paan rui hamh e; Ravguangc kaipat de. Mi zaeng rui mi khang hei gaanv khatna sihni gaengh sw khang maek ge.—Ephesians 2:8-9


Ravguangc ta nzianna, chakhwang swna, khatni kata thuanckuna lungc ni mak dai? Ravguangc khou nang tuang neihla daic liangmei kiu latowna lungc ni mak dai? Jisu khou lwmlouna tingsaengzaeng khang kakhou neihla zaenggaymei latowna lungc ni mak dai? Jisu rui nriahloumei kiu mi hei the:

Apu rui akhou tiloumei guay tei akhou guang puni, kumna akhou guangpui mei ta ai ganc pat lak ge.—John 6:37

Taanc Nuhmei: Internet khou Bart Millard rui suanmei "I Can Only Imagine" twmei lu tei zaucna nking o. Jisu ta sowriu rey liangmei khou tabui kumh pw khang ning bo? Nang tabui ning puni bo, nang lung khou tabui pat puni bo?

GAYCHAMV HEI ZAUC KALUAIH DAT KHO!

Kandih pwmpui na khou rui daic liang, gay liang, ngamv nai liangmei gaychamv lam khou ntaw hei nang pac luai key raph kan the. Nthuk liangmei chamv meicpu meicpui khatni alauc guay khang tiloumei kiu mi hei the, kalam thu mi chamv hei Ravguangc tuang nchumhmei lat Bible khou nai e. Tingsaengzaeng khang nang ta ti neihla changhlou nimei chamv kiu mi hei na de. Mi gaychamv kiu thu: Jisu khou na ringhbamv nai e! Kakhou lwmlou tho, kum e thei nang ta gulou puni the” twmei hei e.



DAMCLOUMEI Ravguangc rui ramh guay damclou tuang e, kumna ramh guay kiu gaymei raan na bam khwan e. Ravguangc rui maansei ta damcloumei hei nzianna, chakhwang swna, lat piuna khatni kata thuanckuna bam khang damclou tuang e, kumna kakhou neihla daic liangmei latowna kamei hei gay liang e twmei lyan bam khang e (Kalumlu 33:8-9).



PAAPC KHOU KEYLOUMEI Adam lev Eve tei ramh kabah thay makna Ravguangc khou rui duc tat the, Ravguangc lat liam the, paapc ti pat the, mi khou tei rui theihmei guang the, kumna Ravguangc rui damcloumei gay kanmei kandic khou simeikazaat guay guang the. Adam khou rui meic kathuih khou paapc zin lik pat the, Ravguangc lev maansei ta mi tei rui ti ntamlou the (Romans 1:21; 3:23).



THUAKLOU DATMEI Ravguangc rui kanac Mpouh ta ndiuguanglou the, paapcmei nunc rui phungc nicmei latzan tei Jisu rui cross khou theiclouna phungclou the. Jisu theihmei khou rui ringcthau dat the, ntaw thu tingkauh khou bam the. Jisu khou lwmloumei paan rui paapcmei nunc kaniw paap khou rui kuakloumei, nthuihmei ravchap tatmei, khatni ringcsuangmei panty tuang latryan tei latow nuh the (1 Peter 2:24).



TI NTHUIHLOU DATMEI Guangh guay Guangc swna rih ngamna Jisu guang dat puni, tingsaengzeang khang paapc ti hei sw mutlou puni, kumna ramh guay kathanc swna kasiamlou dat puni. Jisu rui meic kathuih ta latzan sw puni. Kakhou lwmlou makmei guay ta tingsaengzaeng khang theihmei latzan sw puni. Tikih kakhou lwmloumei guay thu Ravguangc lev tingsaengzaeng neihlamei khou kamei lev bam nchamc bam puni (John 14:2-3).

GAYCHAMV HEI RAC TAT RO!

Mi gaychamv hei thow khou nang raclou nuh puni bo? Jisu tuang gaychamv hei dinh khang karuc khou naime ramh maengc lev kalatkaeng guay tei sinsw o.

SINSW GAY NIMEI BAANSIN

Helping Children to Understand the Gospel

Mi hei book launa de, alauc nunc lungning khou gaychamv chu gutlou nuh khang chammaanvlou khang nchamlou puni, bumaengh khou daic thaumei thaek ti thaylou puni, gaychamv tuang nthukmei lam dinclou puni, alauc nunc rui lalou gaymei lwan khou gaychamv nchumhna dinclou puni. Kaikhunh khou neihdak 10 kalum huayneymeigavv khou sinsw khang pary nic kazauh e.

Glorious God, Glorious Gospel (Devotional, Coloring Book, Notebook)

Kaikhunh khou puipu rui alauc nunc lev kalum kariumei gavv khou sinswna kaniw ta kabangbi swmei, thaylou mak nuh makmei gaychamv tuang nchumhmei gaymei lam ti thaylou khang baansin e. Mi book khou notebook nai puni, karing ntey khang ramh maengc nic nai puni, mi kiu rui alauc nunc ningting ti sinswna kaniw lungning ti kakhanh khang e.

Making HIM Known Series

Making HIM Known book guay (God's Name, God's Promise, twmei kumhmei guay) hei alauc nunc khou puipu nunc rui gaychamv tuang nthukmei lam guay dinc nuh khang, tingmik tingmik tuang panty khou gaychamv kiu lungc ndauh thau khang nchamloumei book ge. Mi khou hei kalum huayney khang, alauc nunc palup talic khang, gaychamv kabac thaymei thay makmei sw nthan khang latthanv nunc, khatni panty khou piu thau khang nchamloumei guay nic nai puni.

Mothers: Disciplers of the Next Generations

Mi book launa khou hei pui guay ta katiuloumei thu nac nunc khang tingmik pum gaychamv dinclou nuh khang kadow chamei ti maan makna Jisu khou lwmlou khang katiulou khang e. Kumna Jisu rui taanc luailoumei ringhbamv tuang taanv khou hei pui guay rui ngangvlouna nah nunc ta ringhmei khou zaylou khang nchamloumei book ge.

A Father's Guide to Blessing His Children (Book and App)

Nah nunc khou pu swmei gaavn khat rui suaihiam latsav saloumei hei Ravguangc tuang suaihiam neyloumei chaeng nthukmei khat the, mi suaihiam khou tei puipu rui nah nunc lungc guang nimei khang ta machunhna bammei mikphaengc nic dinc ndauh e. Mi book A Father's Guide to Blessing His Children lev, app swna naimeigavv A Father's Blessing hei rui nah nunc ta suaihiamloumei lwan khatni kathiak ti thaylou puni, (nah nunc na ta hamhna baimeigavv nunc ta nic suaihiamlou thay puni), kumna mi tei rui kaniw tuang lwmmei ti tanclou puni.

Fighter Verses™

Mi Fighter Verses Program hei lwmloumei nunc rui Bible zauh makna pac thay khang katiulouna lwmmei ric adow khang lwmloumei kaniw ta ti chammaanvloumei book ge. Neihdak kathuic khou gaavn khat khat swna, kaikhunh swna, khatni phwam phwam swna Ravguangc tuang lat verse khat khat swna hamh e thei pary langv nthyammei zauh makna pac thay khang katiulou tuang e.

Big, Bold, Biblical Prayers for the Next Generation

David Michael rui guang nicmei meikin khang ravsuai daihmei, baucna huayneymeigavv, khatni Bible lat thei layna kumhna huayney nina cho twmei mikphaengv zauc duc patna ravsuai 17 kasiamlouna mi ravsuai khou tei nang nic lay kazauhna guang nicmei meikin khang huayney kazwanlou nuh khang kasiamlou e, mi khou kiu kaziapmei Bible bamv guay nic huayneymeigavv khou ti lumclou khang lou kazauhlou e.

Karuc khou naimeigavv baansin guay lev baihmei azuh latow khang [Truth78.org/products](https://www.truth78.org/products) twmei khou gutlou pw o.

Truth78 hei guang nimei meikin khang mikphaengv ducna taanc bammei ministry e—alauc nunc rui Ravguangc ta thay guang diuc khang, kata chakhwang swna daic thau diuc khang, khatni Ravguangc ta kunghmei lanv swna Christa khou na kaniw tuang machunc nai diuc khang, kum pw Ravguangc hym khang rui lwm nuhmei ziap swna lungc thau diuc khang kasiamehmei taanv e.

Aniw tuang tamhmei thu phwamling guay lev kaikhunh nunc khang kage naime baansin kasiamehlou pw khou kaniw rui guang nimei kin ta lwmmei khou zaylou diuc khang kakhanh kanzan nkhavehlou khang, lungning ti lumclou khang, khatni taanc pat ni khang lungk katiu thaulou khang training sw nimei baansin kasiamehna mi paan tei rui Ravguangc tuang Lat ntangvna dinclou khang twmei hei e.

Ravguangc lam khou kakw swmei, Bible khou phayding swmei, Gaychamv ta nthukna swmei, Christa hym ti daihmei, Bumaengh khou ngangvloumei, riakdyn khou nchumhmei, khatni ziap kasiamehmei khou lungk gutmei baansin lev training sw khang kasiameh patmei taanv khang rui katpatna taanc bam e.

BAANSIN LEV TRAINING KHANG

Truth78 rui ntaw ntaw kabangc khou naime baansin lev Training khou piu khang ramh tina bam e:

VISION-CASTING AND TRAINING

Book lau launa, video, seminar swloumei audio, articles pang, khatni training swmei khou sinsw khang baansin nunc, aniw tuang mikphaengv, taanv, khatni nthukmei swna kakhanhmei latbamv guay mbuna dinclou nimei pang hei kazaat geicna ti bam e, mi khou kiu rui alauc nunc khou nchamloumei thiak, khatni kabangbi swmei latbamv guay nic nai puni. Mi guay hei geih thangc thu aniw tuang website khou rui nsa latow puni. Mi baansin guay kiu rui ministry khou bammei kapy nunc, volunteer nunc, khatni puipu guay rui Truth78 tuang mikphaengv lev tamhmei hei phwamling lev kaikhunh khou piu thay khang nkhavehlou puni.

CURRICULUM

Bible hei formal swna dinh khang aniw rui baansin kasiameh pat re. Alauc nunc lairik ncham bammei ganv dak khou kaduanc chana Ravguangc tuang lat hei ntanghna dinclou khang karamhmei lungc khou mi hei rui aniw tuang tamhmei lyanlou puni. Mi khou kiu Sunday School khou sinsw khang nai e, Neih dak kak khou sinsw khang ni nai e, Vacation Bible School hamh e thei Bible Camp swna sinsw khang, nai e. Mi guay hei geih thangc thu Christianmei nunc rui School khou khatni kaikhunh khou nganvna sinsw khang piu nuh e.

PARENTING AND FAMILY DISCIPLESHIP

Puipu rui kanac nunc ta ziap kasiamehlou diuc khang piu khang baansin khatni training khou sin khang ramh kazaat geicna aniw rui kasiameh patlou e. Booklet, video, Powerpoint presentation, family devotion khou piu khang, alauc nunc khang book, article nunc, khatni baihmei gaymei baansin nunc kazauh e. Mi baansin mpeyna khou hei Growing In Faith Together (GIFT) twmei thu puipu rui nic alauc nunc khang dinc bam khou tei kariuna Bible tuang nchumhmei tei piu nchamc thau khang, classroom khou alauc nunc khou dincloumei tei dinhpouc/peic nic kazauhna lwmmei khou daic thau khang karamc nchamc khang dincloumei langv nic nai puni.

BIBLE MEMORY

Aniw rui kasiamehloumei Fighter Verses™ hei Bible zauh makna pac thay khang khatni phwamling nunc, kaikhunh nunc, khatni gaanv khat gaanv khat swna mi hei taanc lana panty saanvsaengh Ravguangc lat ta nzianna bam khang e. Fighter Verses hei lwmmei ric adowmei khou Bible bamv nchiwna thay gay khang, thayloumei guay tei sinpiu gay khang zaucna kadahloumei Bible bamv pang e. Karaan na pac pat thay makmei nunc khang kabi swmei Bible bamv 76 hei ramh maengc lev kazauhna nai e. FighterVerses.com khou tei gutlou pw o, kumna neihdak kathuic khang devotion sw khang khatni pac thay gay khang kasiamehloumei kamanv maekna khang nai e. Quiz sw gay khang Fighter Verses App download sw o, lu nic nai puni, pary dangvna nai puni, ti ningtow kaluaihlou dat khang nai puni, khatni baihmei nkhavehloumei latow puni.

Karuc khou naime puat guay khang, khatni kalam thay mbu ni e thei kabangc khou naime bamv khou hei thanvlou pw o: